

Kerweredd 2008

GIVE ME HOL DIR
A KISS! DOCH DEIN
KISSEN SELBER!



Buenos Dias – Hello - Boschur- How un Gun Dach,
ich muss ufbasse sunscht steiger ich mich voll in die Sach.

Das war die Begrüßung fer eich un die rechtlich Welt,
jetz werd Reiwelskerch uf de Kopp gestellt.

Reißen die Aue uf, jetz werd nimmi gepennt,
jetz werre die Schwachsinnische vun de normale getrennt.

De auswärtisch beigeschlappte sei erklärt,
dass e Kerweredd bei uns nur selten zu enem Herzinfakt fehrt.

Bevor eich es Herzkläppche aus de Naseflicheh schlaht,
misse ner wisse bei uns werd net immer die Woahrhät gesaht.

Bevor ich mit de Redd so richtisch ofange kann,
here mer noch vun de Straußjugend allemann,

die Reiwelskeier Kerb soll lewe...

... hoch

... hoch

... hoch

Pensionierte Kellergeisichter

Wie ner alle siehn sin mer dies Johr nimmi so viel,
die Vorgänger hon nämlich erreicht ihr Ziel.

An de Sitzung hon se ach schun verpasst kried a neier Name,
fer die pensionierte Kellergeisichter wird jetzt gemach Reklame.

Gemach honse sehr viel in de letschte Johr,
so a Straußjuchend gibt 's nimmi – ihr Leit das is werklich
wohr.

Ach wenn einische üwer se schelle,
sie stehn uns immer noch mit Rat un Tat zur Stelle.

An de Kerb un an 1.Mai hon ner gar kee Müh gescheut,
dafür wolle mer eich danke heut.

Is echt schad das ner jetzt schun wolle gehe,
awer die Familieplanung soll jetzt an erschter Stelle stehe.

Ihr Lebe besteht jetzt aus heirate, Kinner krien un die Rente
kassiere,
ebbes besseres kann ne in ihrem junge Lebe jo net bassiere.

Würd die Merkel das here, dät se die Hän üwerm Kopp
zusamme schlahn,
Rente mit 23 – das derf mer werklich keenem sahn.

Mir hoffe das mer das genauso gut anne krien wie ihr,
un aus Dank krien ihr jetzt noch was überreicht von mir.

Mir hon extra a Denkmal für eich gebaut,
das eich hoffentlich vom Hocker haut.

Kurt Beck

So e Berühmtheit hot Reiwelskerch a noch net gesieh,
de Minischderpräsident Kurt Beck war do- das gabs jo noch nie.

Mim Becksche Bus iser no Reiwelskerch vorgedrung,
do kam de Emil a schon als Businweiser ogesprung.

Schick gemacht hoter sich mit allem drum un dro – wie sich das
gehert,
un hotem Beck glei emo die Reiwelskeier Maniere gelehrt.

Die Kinner dun in jubel ausbreche,
un wolle nom Hänn schittele ihr Hänn nimmi wäsche.

Die Bursch reserviere mer fer uns honse gesaht,
un hon de Männerstammtisch grad emo vun ihrem Platz gejaht.

Kurzerhand hon die sich dann unerm Schunk seinem Carport
vesammelt,
un hon sich dort die unmöglichste Theorie zusamme
gestammelt.

Ganz bequem hanse sichs gemacht, bei belegte Brötcher un
Snacks à la Mann,
un hon unser Beck beowacht, waser macht un waser kann.

Wie konnte ihr nur net an de Cronebach un de Emil denke,
un dene net a e Inladung schenke.

Beleidischt ware se un sin net kumm,
un hon sich gedenkt – das hanse jetz devun.

De Beck hot noch netemo es Lisabeth ingelaad,
is jo eigentlich schon schaad.

Awer Lisabeth mach der nix draus, die hans äfach net druff,
dodefor han mir e kläner Trost fer dich – un rufe dich jetz emo
eruff.

Die Blumme han durscht

Wie jedes Johr is a dismo de Emil debei,
ich män – wie solls a annershd sei.

Im Garte duter öftersch mo schaffe,
un während dessen dut sei Frau im Haus de Dreck ufraffe.

De ganze Daach dut se schwitze,
bis a die dunkelschd Eck dut blitze.

Do derfer dann wanner im Garte war nimmi enin um ufs Klo ze
gehe,
do kenntem die Pinkel bis zum Hals enuff stehe.

Er dut dann halt de Nachbarschfra die Blummeküwel gieße,
vielleicht mänter jo sie würde dann besser sprieße.

Vielleicht mänters jo met de Blumme a nur gut,
weils Hannelore net mit ne vezeele dut.

Es war awer net es erschte mo,
em Hannelore sei Nos hattem gesa – der war schun öftersch
do.

Eines scheenen Tages hots de Emil dann erwischt,
un hot ne dann üwer de Gartezaun lauthals ufgemischt.

Nur mit de Blume wars dann awer a net gedu,
selbscht es Haus kam noch als Außetoilett dezu.

Ekelhaft ises – ich kanns net annersch sae,
un es Hannelore kanns a nimmi ertrae.

Nur an sei Garte losster nix kumme,

wenn bei ihm die Blumme ingehe, is er jo de dumme.

Mei lieb Emilche, hot mer dich dann net gelehrt,
das die Pinkel net in nachbarsch Garte sondern ins Klo enin
gehert?

Stell der doch e Ämer in de Keller,
bau der Klo oder stell der hie e diefer Deller.

Nur loss doch die Sache vun Annerleits in Ruh,
jemand macht das bei dir, was sahschen du dezu?

Tierisch

In de Hirtestroß bassiere echt gruselige Sache,
die dun mer so richtig Angscht mache.

In Reiwelskerch dürfe sich junge Fraue,
nachts net mehr allä uf die Stroße traue.

Ich hab für solche Fäll immer mei Begleitung dabei,
was mer do gehert hon – war nämlich net so einerlei.

Vielleicht hots a an de zu hohe Menge Alkohol geläh,
das war an dem Owend echt nimmi schee.

Mei Hand konnter a net mie los losse,
mit seine vor Angschd nassgeschwitzte Flosse.

Sei Name wolle mer awer net erwähne,
sunscht det sich de Mike noch schäme.

Ich konnt das Geräusch net definiere,
do dun ich mich a net schikaniere.

Es hot sich ogehert als würd e Elch röhre,
das konnt mir zwo net üwerhöre.

Orer es ware zwo Hase beim rammele,
do konnte mer nur noch stammele.

Orer wares e paar Pferde wo han geschnaupt,
in der Situation hätte mer echt alles geglaubt.

Orer hot sich e fremdi Person e Spaß gemacht,
un hot sich über uns beide kaputt gelacht.

Wir als Sherlock Holmes hon unser Fall dann doch noch
erfolgreich ufgeklärt,
doch dodro hot sich de Marco die Nacht net dro gesteert.

Un denk dro es nägschte mo es Fenschder zu schließe,
bevor die Jäscher noch vesuche dene Elch zu erschieße.

Streik: Fiesta leet Arwet nieder

Es Johr 2008 hot fer mansche so richtisch gut ogefang,
ich han die Redd vum Adelinde un ihrem Mann.

Die zwä ware naderlich a e bisje ins neie Johr feiere,
un wollte dann nachts irgendwann mitem Auto hämwerts
steiere.

De Fiesta wollt awer nimmi wie die zwä,
„ei Reinhard du kriesch awer a alles klä“.

Mer honse dann bei unserem traditionelle Rundgang beowachte
kenne,
was die gemacht han, konnt mer dann awer kä Auto fahre mie
nenne.

Kä Angschd, sie sin net in Schlangelinie gefahr,
die Sicht vun dene zwä war eigentlich noch ziemlich klar.

Es hot ehr ausgesieh wie e Ausfluch mit Mutter Gans,
es klä Bubsche unner Fiestas Gefieder uns Weibsche hängt am
Schwanz.

Es Fitnesscenter konnts sich an dem Daach dann spare,
nur em Reinhard sei männlich Ehre konnts net bewahre.

Der is nämlich nur neue hergeloff un hot gelenkt,
un hot dodebei noch netemo an sei Fra gedenkt.

Awer Adelinde hätttsche der dei Mann e bisje besser erzoh,
hätttsch du an Neijohr die bessere Karte gezoh.

Hauseinsturz durch Unkrautbefall

In de Hohl hott schun lang e Haus leergestann,
so e Art – Gewächshaus – wo alles gut wachse un gedeie kann.

Es scheenschde Efeu hott sich durch die Kisch gewunn,
un ab un zu – hannse sogar noch es Globusblättche in das ald
Heisje gebrung.

Hoffentlich dricke die net so fescht an de Briefschlitz hann ich
gedacht,
net das do noch was zusammenkracht.

Unkräuter mit Brennhaare,
honn sich dort vedählt in Schaare.

Annere Gewächse konnten sich durchs Dach durchbeiße,
bis die Veschel durch Löcher in die Wohnstubb scheiße.

Die Dischdele, - die Eierpetsch, - die Gänseblümcher, - die
Sunneblumme,
die hatten dert es scheenschde Läwe...

Guti un frisch Waldluft war dert drin,
hoffentlich sin dann net a die Wildsai enin.

Irgendwann hann die Brennessle die Hausdeer vedrickt,
un dann isses Heisje sammegeknickt.

Üwergeblibb is nur noch e Haufe Schutt un Dreck,
jetz kammers Heisje inpacke in Säck,
also wolle mer hoffe, dass das Gerümpel an de nägscht Kerb is
eweg.

Campe in Reiwelskerch

Reiwelskerch werd in de Umgebung immer bekannter,
un a fer Leit vun weiter weg immer interessanter.

Net nur die Wasserbursch lockt die Leit vun nah un fern,
a die Landschaftsbilder siehn die Leit gern.

Mittlerweile hammer a newer unserm Schätzje,
fer Camper e schee Plätzje.

Leider dürfe se dort nur drei Daa vebringe,
un müssen dann schun wo anderschd um e Stellplatz ringe.

Vorsicht das es a jo net e Daa später werd,
do gebts nämlich äner der anderschd mit de Hufe scherret.

Do gabs nämlich ä Geschicht,
do hot de Sonhard tatsächlich welche am vierte Da erwischt.

Die ware am dritte Daa noch ufeme Feschtche,
wollte an dem Owend nimmi fahre, also honse sich fer ä Nacht
nommo geleet ins Nechtsche.

De Sonhard hat sich das strengschdens notiert,
daser bei dene viele Camper a de Üverblick net veliert.

Er hot e Mellung an die Kreisverwaltung Kusel gemacht,
was wolltern dert? – dert werrer ausgelacht.

Mir all sinn der Meinung er sollt sei Nerve liewer e bisje schone,
das det sich am Enn a fer die Camper lohne.

Gott sei Dank macht sei Fra seit neischdem Shi-Gong,
un hot bei ihrem Mann glei mo begonn.

Die böse Schwingunge vesucht se a aus de Kellebohn zu krie,
ob das klappt werre mer dann noch siehe.

Uf jede Fall scheints ums Hause Sonhard un Co ruhischer zu
sinn,
un a in de Kellebohn rund um die Bursch un die Linn.

Ich hab jetz nur noch äns ze sae, womit ich a ans Enn vun dem
Stick komm,
sei fröhlich un nemms locker, omm.

So – jetzt wer ich langsam Schluss mache,
un hoff ihr konnte über dene Spaß a lache.

Ich will eich an dere Stell mo noch sah,
das ner uns vezeele müsse was im Ort so üwers Johr geschah.

Weil sunschd müsse mer dichte un noch mehr üwertreibe,
das mer a negschtjohr e Kerweredd kenne schreibe.

Ich du noch schnell mei Kehle eele,
un rufs Lisabeth nochemo zu mer, das dut eich a noch e bisje
was vezeele.

Lisabeth....

Zum gute Schluß kummt unser Straußjugend noch,

die Reiwelskeier Kerb soll lewe...

... hoch

... hoch

... hoch